



種花草

老是無法度逃避的代誌，年限若到，就準講人猶勇勇健健，全款攏著攢退休做閒人，轉去食家己爾，敢閣有啥物步通變咧？毋過，雄雄無稽的人規工幌來幌去，敢袂傷無聊？若無揣寡工課來塌(thap)，恐驚鬱卒、破病就隨綴倚來，自按呢行去嘛無的確。

誠拄好我這站仔有佇雙溪新買兩分地的田，阮兄哥恰我攏有意向欲種一點仔花草罔耍罔坦坦，食老加減做議量；繼落去，兩兄弟仔就起跤動手烏白變，毋是上山掘樹頭，著是覘跼園仔內鉸枝、翻盆、沃水，對透早舞到日頭落山，兩雙手較無閒爾，耳空鬼仔恬靜、頭殼清醒甲袂顧得，若恰看電視、唱歌、咁酒、揣厝邊頭尾練痞話的齣頭比起來，心肝頭顛倒快活濟矣。

這種看天踏地、遊山觀海的日子，拈開兄哥伊莫算，誠少有外人來開講、嘛揣無閒工通去接接(tsih-tsiap)，予我猛醒著「恰人這款動物交插、來去，毋但是歹剃頭爾，不時都心肝頭實實，誠袂爽快」的道理。因由是出佇，人有一支喙，會割人、鑿人，會講白賊、搬閒仔話，閣較僥倖的是使弄兼圖洗，親像連續劇按呢，一集繼一集，牽袂煞割袂斷，較加嘛有窮分、怨感，會了袂盡的漚戲一直搬，路尾仔的結局，免臆嘛知，是暢著奸巧，克虧著古意人。

有一个哲學家捌講過：「所有的動物，獨獨『人』知影有『死』這種代誌，這是『話語、文字』不良的副作用所致。」講較白咧，有語、有文了後，人就會知影往過、煩惱現時、數想未來，使弄教示一大拖，僥倖失德規山坪，莫怪世間的是非恩怨濟。我家己咧想，人若是會當恰花草全款，干焦會發穎、大穰、開花、落葉，就袂加講話、揸跋反，就無弄狗相咬、設計害人，毋知欲偌爾仔好咧。

作者：藍春瑞

☆詞彙學習☆

【行去】kiānn--khì：死亡的諱稱

【分】hun：土地面積的單位，「甲」的十分之一，約三百坪

【做議量】tsò-gī-niū：娛樂、消遣

【翻盆】huan-phûn：舊盆栽換新土

【耳空鬼仔】hinn-khang-kui-á：耳根

【交插】kau-tshap：交際往來

【實實】tsát-tsát：鬱積、堵塞

【窮分】khîng-hun：計較

【克虧】khik-khui：委屈

【揸跋反】tshia-puàh-píng：反覆折騰、勞碌奔波

【弄狗相咬】lōng-káu-sio-kā：從旁挑撥，使雙方互鬥

☆文法學習☆

【敢.....？】：表示疑問用「敢+句子」，後面不再加其他疑問詞，是比較符合閩南語句法的用法，例如本文中的「敢袂.....」、「敢閣有.....」等。近年來因受到國語的影響，已有越來越多人使用「.....嗎？」、「.....吧？」等疑問詞，未來是否正式進入閩南語，仍有待觀察。